



De STHB

(Stadt Heimatbund Münster e. V.)

is för alls dao, wat met mönsterske Heimatkultur to doon hät. He bütt siene 33 Vereine Hölpe bi Heimatpläage, Heimatfüörskung un Präsentation van iähr Doon.

He möch daoto bidriägen, dat Mönster sienen Patt wiedergeiht äs Stadt van Wiettenschop un Liäwensard.

He arbeidt daoför, dat Mönster in en Europa, wat ümmer mähr bineenwäss, Mönster bliff: de schöne Stadt in de Midde van de hele Region, de Stadt, in de to liäwen sick lauhnt un Freide mäk.

He will methelpen, dat all dat Guede, wat düör 1200 Jaohre in Mönster wassen is un et druogen hät, siene Kraft behällt.

He geiht daovan uut, dat jedereen in de Büörgerschop van Mönster sick för dat Hele tostännig föhlen un engageren kann un sall; dat bedrapp besunners de Arbeit in de Vereine un in en Ährenamt. So kann dat, wat de STH B dööt un will, up bredden Grund in de Stadtgeschop staohn.

Uut dat graute Spektrum van STH B-Aktivitäten sallt hier drei nommt wärden:

- Mönster äs Stadt van den Westfäölsken Friäden van 1648 un äs Friädensstadt vandage wiederbrennen,
- de nederdüütske Kultur in Spraoke, Literatur, Leed, Thriaoter usw. bewahren un pläagen,
- Mönsters Büörgerschop upmüntern, sick för de Stadt to engageren.

Afriet-Riemsels

Niewelmaond / November 2024

En Lappen Papier

En Lappen Papier,
afrietten,
versmiärt,
weggmietten,
in de Gauske fluogen,
Wind weiht'n
unner dienen Foot.
En Waort,
wiederdruogen,
unbedacht säggt,
half geluogen.
Afgunst weiht et
unner de Mensken.
Höers du se lachen?
Ächterhöllsk, tüeksk?

Spöers du de Augen
in dienen Rüggen?
Spitzk?
Se gaohnt
üöwer di wegg
äs üöwer Papier,
wat in de Gauske foll.
Dao
finns du di wier.
Nicheen
büört di up.
Nicheen
deelt sienen Mantel
met di.
Se gaohnt vüörbi.

Franziska Jürgens-Fels, Fußspuren, Emsdetten 1986

Spruch des Monats:

Et is kien Twievel, kine Fraog':
Doo, wat du wus, de Lüü küert doch.

Worterklärung/Wörde:
Afgunst - Neid; Gauske - Gosse

Stadt Heimatbund Münster e.V.
Geschäftsstelle im historischen Torhaus
Neutor 2 | 48143 Münster
Tel.: 0251 98113978
info@stadtheimatbund-muenster.de
www.stadtheimatbund-muenster.de

STH B